



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-235/01.
Sarajevo, 17. maja 2001.

Z A P I S N I K

sa 8. sjednice Predstavničkog doma Parlamentarne skupštine Bosne i Hercegovine,
održane 17. maja 2001. godine

Osma sjednica Predstavničkog doma počela je s radom u 11,45 sati. Predsjedavao je dr Sead Avdić, predsjedavajući Doma.

Sjednici je prisustvovalo 36 poslanika. Odsustvovali su poslanici Osman Brka, Branislav Lolić, te poslanici HDZ-a Mirko Baković, Miro Grabovac – Titan, Zdenko Vukić i Marko Amidžić.

Početu sjednice, kao gosti, prisustvovali su predsjedavajući i članovi Predsjedništva Bosne i Hercegovine, predsjedavajući Vijeća ministara, ministar civilnih poslova i komunikacija, ministar vanjskih poslova, ministar za evropske integracije, ministar vanjske trgovine i ekonomskih odnosa, ministar za ljudska prava i izbjeglice, kao i zamjenici ministara. Međutim, pri kraju sjednice prisustvovao je samo ministar civilnih poslova i komunikacija.

Osmoj sjednici prisustvovali su predstavnici međunarodnih organizacija: Dieter Woltmann, vršilac dužnosti šefa misije OSCE-a, Tora Valakar, predstavnik OHR-a, Daglas Jonhs, predstavnik Američke ambasade, Sonja Moser Starach, predstavnik Vijeća Evrope za BiH i Helen Bakker, politički savjetnik OHR-a.

Poseban gost na početku 8. sjednice bio je gospodin Laslo Surjan, reporter Vijeća Evrope za Bosnu i Hercegovinu.

Predsjedavajući Avdić, pošto je otvorio sjednicu, pozdravio je sve prisutne poslanike i goste. Posebno je pozdravio g. Lasla Surjana i zahvalio mu se na naporima koje, kao reporter Vijeća Evrope za Bosnu i Hercegovinu, čini u cilju da bi BiH postala član Vijeća Evrope. Zatim je zamolio gospodina Surjana da se obrati Predstavničkom domu.

Gospodin Laslo Surjan na početku svoga izlaganja rekao je da mu je velika čast da govori poslanicima ovog Doma i zahvalio se predsjedavajućem što mu je to omogućio.

Pored ostalog, gospodin Surjan je napomenuo da su poslanici u vrlo specifičnoj i unikatnoj poziciji. Predstavnici u parlamentarnim kućama uvijek imaju impresiju da su oni ti koji prave istoriju, ali da je to rijetkost. Rekao je da predstavnici BiH u ovom

trenutku ne mogu učiniti ništa drugo nego svojim postupcima uticati na istoriju svoje zemlje. Sada su u poziciji da izgrade jednu nezavisnu državu, jednu državu koja će biti unija različitih religija, različitih etničkih pripadnosti. “Poslije strašnog iskustva rata koji je BiH imala, vi ste sada u poziciji da izgradite jedno društvo koje će služiti, npr. čitavoj Evropi... Sada cijela Evropa ima povjerenja u vas i čeka da joj pokažete da možete to učiniti... Internacionalna zajednica je spremna da vam pomogne, ali nije spremna to učiniti bez vaše pomoći”, rekao je g. Surjan. Potom se ukratko pozvao na historijsko iskustvo iz XX vijeka, te naglasio da je poslije II svjetskog rata Evropa krenula drugim putem. Počelo se govoriti o individualnim pravima, o osnovnim ljudskim pravima. Naglasio je, pored ostalog, da bez implementacije ljudskih prava i sloboda ni jedna zemlja nije u dobroj formi. Skrenuo je pažnju poslanicima da, kad donose svoje odluke, moraju poštivati osnovna ljudska prava, ali isto tako i prava porodice, pa onda dalje prava lokalne zajednice ili kantona, i onda, na kraju, prava nacija. Rekao je da se mogu kriviti pojedini političari da prave greške i da su na periferiji političkog kruga, ali se svi moramo ograditi od toga da krivimo cijele nacije i da se uvijek mora prihvatiti odluka biračkog tijela. Prava ljudi da budu pripadnici zajednica, da budu pripadnici određenog naroda, zaštićena su u Vijeću Evrope. “Time što ćemo vas pozvati u Vijeće Evrope mi vam u isti mah nudimo i protekciju i iskustvo svih naših povelja i svih evropskih standarda pod kojima bi i vi automatski bili”, rekao je g. Surjan.

Dalje je g-din Surjan istakao da je za Vijeće Evrope posebno važno da Parlament BiH donese Izborni zakon. Pozvao je da mu Parlament u tom smislu pomogne, jer će njemu to pomoći da predoči svojim kolegama da BiH jeste spremna za ulazak u Vijeće Evrope. Također je rekao da je on zaista uvjeren da je BiH u stanju da postane članica Vijeća Evrope i da i on misli da je donošenje Izbornog zakona nešto što će služiti u budućnosti, te da očekuje da će to biti korak koji će pratiti i drugi korci.

Što se tiče Ustava i nekih drugih jednako velikih stvari, g. Surjan je rekao da misli da političari koji su u strankama koje konstituišu Vladu BiH i njihova opozicija moraju barem na nekim stvarima postići konsenzus. Konsenzus se može postići jedino dijalogom, samo kroz obostrano razumijevanje i kroz spremnost na kompromis. “Kompromis je tajna onoga kako uspijeva politika svih evropskih zemalja. Kroz kompromis vi ćete samo jačati i jačati svoju zemlju... Budući da se u zemlji u kojoj još uvijek ima toliko političkih tenzija, toliko nepovjerenja, vi morate jasno definisati vaš put kako doći do rješenja... i način kako doći do evropskih integracija... Ako imate jasnu sliku budućnosti i vrlo jasan zajednički cilj, onda će vaš proces do ostvarivanja toga cilja biti puno brži nego bez njega”, rekao je, pored ostalog, reporter Vijeća Evrope za Bosnu i Hercegovinu, gospodin Laslo Surjan. Naglasio je na kraju da je kapija Vijeća Evrope za Bosnu i Hercegovinu otvorena, te da će on učiniti sve što je moguće da BiH pozove da bude članica Vijeća Evrope, ali da ima uslov – da će poslanici glasati za donošenje Izbornog zakona i upravo tim činom kupiti kartu za Vijeće Evrope. Ukoliko Parlament donese Izborni zakon onda će Parlamentarna skupština Vijeća Evrope u svojoj plenarnoj sesiji u mjesecu septembru glasati za prijem BiH u Vijeće Evrope, zaključio je g. Laslo Surjan.

Predsjedavajući Avdić se srdačno zahvalio g. Surjanu na riječima ohrabrenja i uvjerenja da ima smisla vjerovati da BiH u 2001. godini postane redovni član Vijeća Evrope, te da u tom kontekstu sigurno nema alternativnog puta za ovu državu osim puta u evropske integracije. Naglasio je da je Kolegij predložio još na današnjoj sjednici uvrštavanje u dnevni red Prijedloga izbornog zakona. Potom je predsjedavajući Avdić dao pauzu.

Poslije pauze predsjedavajući Avdić je upoznao Dom da su odsustvo sa sjednice opravdali poslanici Osman Brka i Branislav Lolić, te da sjednica ima kvorum za rad i

odlučivanje. Zatim je dao uvodne napomene u vezi s prijedlogom dnevnog reda, koji su poslanici dobili prilikom saziva sjednice. Napomenuo je da je u međuvremenu Vijeće ministara u parlamentarnu proceduru dostavilo Prijedlog izbornog zakona BiH s zahtjevom da ga Dom razmatra po hitnom postupku, u skladu s članom 104. Poslovnika Doma. Iznio je stav Kolegija da se u dnevni red ove sjednice uvrsti zahtjev Vijeća ministara za donošenje Izbornog zakona po hitnom postupku. Također je iznio prijedlog Kolegija da se s dnevnog reda skinu Izvještaj o stanju DKP-mreže i Izvještaj o pripremama za donatorsku konferenciju zemalja OIC za povratak izbjeglica u BiH. Predsjedavajući Avdić upoznao je poslanike da je u toku sjednice gospodin Mariofil Ljubić podnio Prijedlog izbornog zakona BiH, s zahtjevom da se razmatra po čl. 104. Poslovnika. Napomenuo je da se Prošireni kolegij Doma saglasio da se Prijedlog zakona uputi u parlamentarnu proceduru, te da ga je Kolegij uputio Ustavno-pravnoj komisiji radi davanja mišljenja o ustavnosti istog.

Potom je predsjedavajući pročitao prijedlog dnevnog reda, s iznesenim dopunama. Napomenuo je da je Prošireni kolegij postigao saglasnost o dopunama, ali ne i oko zakona Visokog predstavnika.

U diskusiji povodom prijedloga dnevnog reda su učestvovali:

Mirko Banjac – predložio da se u dnevni red uvrsti utvrđivanje odgovornosti funkcionera u institucijama BiH za političko-bezbjednosnu situaciju u BiH. Obrazložio je prijedlog i upozorio, pored ostalog, na izjave pojedinih nosilaca odgovornih funkcija koje pogoršavaju situaciju u zemlji. Predložio je da Dom formira parlamentarnu komisiju koja će pratiti i Parlament redovno izvještavati o političko-bezbjednosnoj situaciji. G-din Banjac je takođe predložio da se po hitnom postupku u parlamentarnu proceduru stavi Izborni zakon. Naglasio je da je on na Proširenom kolegiju tražio da se po čl. 105. Poslovnika usvoji zadnja verzija Izbornog zakona koju je sačinila međunarodna ekspertska grupa.

Adem Broić – U ime Kluba poslanika SDA prihvatio prijedlog dnevnog reda koji su poslanici dobili u sazivu sjednice. Iznio je mišljenje Kluba da će BiH biti bliže Vijeću Evrope ako Parlament usvoji ne samo zakone koje je proglasio Visoki predstavnik, već i druge zakone čiji se temelj nalazi u Ustavu BiH. Rekao je, pored ostalog, da je Klub SDA protiv odlaganja usvajanja zakona Visokog predstavnika. Što se tiče prijedloga g. Banjca, rekao je da Klub poslanika smatra da se političko-bezbjednosna situacija tretira kao prethodno pitanje, ali ne na ovaj već na narednoj sjednici.

Željko Bilbija – Naglasio da je pred Domom donošenje Izbornog zakona, što je ključan uslov za prijem BiH u Vijeće Evrope. U ime Kluba istakao je da se u Predstavničkom domu mora postići politički dogovor i usvojiti Izborni zakon, te i da to treba biti verzija koju je pripremio OSCE. Predložio je da se ova verzija uvrsti u proceduru po čl. 105, zajedno sa zakonima koje je proglasio Visoki predstavnik. Tako bi na jednoj sjednici Predstavnčki dom efikasno i racionalno obezbijedio ispunjenje ključnog uslova za prijem BiH u Vijeće Evrope, rekao je, pored ostalog, g-din Bilbija.

Mariofil Ljubić – Upoznao Dom da je danas, uz podršku pet poslanika HDZ-a, u proceduru stavio Prijedlog izbornog zakona. Ukratko je obrazložio svoj prijedlog i iznio osnovne principe na kojima je isti zasnovan, te skrenuo pažnju na krizu koju su izazvala Pravila i propisi PIK-a. Predložio je da i njegov prijedlog ide u proceduru po čl. 104, a spominjanje člana 105. i donošenje tako važnog zakona bez rasprave nazvao je neozbiljnim. Rekao je, pored ostalog, da se zalaže za dosljednu institucionalnu jednakopravnost konstitutivnih naroda na čitavom području BiH, te skrenuo pažnju na ozbiljnost trenutka i naglasio da je kao predlagач spreman na sve razgovore oko postizanja rješenja zadovoljavajućeg za sve, u cilju da BiH bude primljena u članstvo Vijeća Evrope i da u BiH postignemo unutrašnju stabilnost i ravnotežu.

Mustafa Cuplov – Konstatovao je neefikasnost Parlamenta, što je uočio prateći rad i prethodnog saziva, a što se potvrđuje da se i sada u proceduri nalazi niz veoma važnih akata koji su već godinama u proceduri. Usprotivio se skidanju s dnevnog reda zakona Visokog predstavnika, kao i donošenju Izbornog zakona po članu 105. Poslovnika.

Poslije prednjih diskusija predsjedavajući Avdić je konstatovao da nema saglasnosti oko dnevnog reda koji je predložen, te da postoji saglasnost da se kao 3. tačka uvrsti uvođenje u proceduru Prijedloga izbornog zakona BiH (predlagač Vijeće ministara) sa stavom Ustavno-pravne komisije. Zato je predložio da se Dom izjasni o tačkama koje nisu usaglašene na Proširenom kolegiju.

Prvo je predsjedavajući stavio na glasanje tačku 3. Prijedloga dnevnog reda – zahtjev za razmatranje po hitnom postupku (po čl. 105. Poslovnika) 15 zakona koje je proglasio Visoki predstavnik.

Od 36 prisutnih poslanika ZA je glasalo 26, 10 je bilo suzdržanih (iz FBiH ZA su glasala 23, iz RS 3 poslanika).

Predsjedavajući je konstatovao da za ovu tačku nema entitetske većine iz Republike Srpske.

Potom se Dom izjasnio o prijedlogu g. Banjca, da se u dnevni red uvrsti utvrđivanje odgovornosti funkcionera u institucijama BiH za političku i bezbjednosnu situaciju u Bosni i Hercegovini.

ZA su glasala 23, protiv 5, a 7 poslanika se suzdržalo. Iz Republike Srpske ZA je glasalo 11, iz Federacije BiH 8. Predsjedavajući je konstatovao da za ovaj prijedlog nema entitetske većine iz Federacije BiH.

Gospodin Mariofil Ljubić je u svojoj ponovnoj diskusiji zatražio da se u parlamentarnu proceduru uvrsti i njegov Prijedlog izbornog zakona, pod istim uslovima kao i prijedlog Vijeća ministara.

Predsjedavajući Avdić je dao pauzu od pola sata kako bi zasjedala Ustavno-pravna komisija radi razmatranja Prijedlog izbornog zakona koji je podnio poslanik Mariofil Ljubić.

Poslije pauze predsjedavajući je upoznao Dom da je Prošireni kolegij u pauzi zasjedao i, u situaciji kada nema podrške za razmatranje 15 zakona koje je na privremenoj osnovi proglasio Visoki predstavnik, usaglasio je mogući dnevni red 8. sjednice, koji je potom pročitao.

Poslanik Mirko Banjac je podnio izvještaj Ustavno-pravne komisije sa zasjedanja u toku pauze. Upoznao je dom da je Komisija ocijenila da je Prijedlog izbornog zakona predlagača Mariofila Ljubića u skladu sa Ustavom Bosne i Hercegovine i da može ići u parlamentarnu proceduru.

Također je predsjedavajući Ustavno-pravne komisije upoznao Dom da je Komisija zauzela stav da je učinjena greška u proceduri prilikom glasanja o zakonima koje je proglasio Visoki predstavnik. Naglasio je da nije trebalo glasati o stavljanju tih zakona na dnevni red nego o razlozima za upotrebu člana 105, te da je svih 6 prisutnih članova Komisije glasalo za taj stav.

Predsjedavajući Avdić je, odgovarajući na stav Komisije, pored ostalog, rekao da je svaki stepen hitnosti potrošen jer se već na trećoj sjednici raspravlja o stavljanju na dnevni red paketa zakona koje je proglasio Visoki predstavnik. Govoreći o stepenu hitnosti na trećoj sjednici jednostavno se pokušava politički gimnasticirati i uticati na paralizu ovog Parlamenta u smislu odgađanja rasprave o ovim zakonima, rekao je predsjedavajući Avdić i naglasio da smatra da je totalno iluzorno da Komisija, bez uvažavanja onoga što je rečeno u protekle dvije sjednice Predstavničkog doma, zaključuje

da još jedanput treba glasati o visokom stepenu hitnosti ovih zakona. Istakao je da formalizam nije politika ovog Parlamenta.

U vezi s ovim pitanjem uslijedile su nove diskusije i replike u kojima su učestvovali: Mirko Banjac, Tihomir Gligorić, Hilmo Neimarlija, Boro Bjelobrk, Željko Mirjanić, Emina Zaćiragić, Mirko Mijatović i Bogić Bogićević.

Potom je g-din Željko Bilbija u ime Kluba poslanika zatražio pauzu.

Poslije pauze govorili su Željko Bilbija i Mirko Banjac, a potom je predsjedavajući sumirao stav Ustavno-pravne komisije i, u skladu s tim, dao na glasanje izmijenjeni prijedlog dnevnog reda.

Nakon glasanja predsjedavajući Avdić je konstatovao da je za 8. sjednicu Doma usvojen sljedeći

D N E V N I R E D:

1. Usvajanje zapisnika sa 7. sjednice Predstavničkog doma;
2. Izbor članova delegacija Parlamentarne skupštine BiH u:
 - a) Parlamentarnu skupštinu Vijeća Evrope;
 - b) Organizaciju o evropskoj sigurnosti i saradnji
 - c) Centralno-evropsku inicijativu
 - d) Interparlamentarnu uniju
3. Zahtjev za razmatranje po hitnom postupku (čl. 104. Poslovnika):
 - a) Prijedloga izbornog zakona Bosne i Hercegovine (predlagač Vijeće ministara BiH)
 - b) Prijedloga izbornog zakona Bosne i Hercegovine (predlagač g-din Mariofil Ljubić, poslanik Predstavničkog doma),
4. Prijedlog zakon o udruženjima i fondacijama BiH (drugo čitanje)
5. Prijedlog zakon o vanjskotrgovinskoj komori BiH (prvo čitanje)
6. Ugovor o slobodnoj trgovini između BiH i Republike Hrvatske sa protokolom o definiciji pojma »proizvodnja s porijeklom« i načinima administrativne saradnje sa priložima (radi davanja saglasnosti za ratifikaciju)
7. Izjašnjenje o zahtjevu Vijeća ministara da se po čl. 105. donesu zakoni koje je na privremenoj osnovi proglasio Visoki predstavnik,
8. Poslanička pitanja i odgovori.

Ad – 1: Usvajanje Zapisnika sa 7. sjednice Doma

Povodom Zapisnika nije bilo diskusije.

Zapisnik sa 7. sjednice Doma usvojen je jednoglasno.

Ad – 2: Izbor članova delegacija Parlamentarne skupštine BiH u:

- a) Parlamentarnu skupštinu Vijeća Evrope
- b) Organizaciju o evropskoj bezbjednosti i saradnji ;
- c) Centralno-evropsku inicijativu;
- d) Interparlamentarnu uniju;

Predsjedavajući Doma upoznao je poslanike da su dva kolegija u više navrata zasjedali i usaglasili kriterijume za sastav delegacija. Pošto još nisu sačinjeni konkretni prijedlozi, pozvao je predsjedavajuće klubova da iznesu svoje prijedloge kandidata.

U diskusiji i predlaganju kandidata učestvovali su: Nedžad Šašivarević, Bogić Bogićević, Hilmo Neimarlija, Željko Mirjanić, Ivo Lozančić, Mirko Banjac, Mariofil Ljubić, Ibrahim Đedović, Bahrija Osmanović i Boro Bjelobrk.

S obzirom da je u diskusiji bilo oprečnih stavova i da je izneseno više prijedloga, predsjedavajući je dao pauzu kako bi se među klubovima poslanika usaglasili prijedlozi za sastav delegacija.

Poslije pauze predsjedavajući je iznio usaglašeni prijedlog za sastav delegacija.

Nakon iznesenih prijedloga Mirko Banjac je obavijestio Dom da neće prihvatiti da bude član Delegacije u IPU iz razloga što Srpska demokratska stranka nije adekvatno zastupljena. Svoje mjesto prepustio je nekom drugom poslaniku SDS.

Sa 24 glasa ZA i 6 suzdržanih (iz Federacije BiH 17, iz RS 9), u delegacije Parlamentarne skupštine iz Predstavničkog Doma su izabrani:

A) Parlamentarna skupština Vijeća Evrope:

1. Mediha Filipović
2. Ivo Lozančić
3. Momir Tošić

B) Organizacija za evropsku sigurnost i saradnju (OSCE)

1. Branislav Lolić,
2. Bahrija Osmanović

C) Centralno-evropska inicijativa (CEI)

1. Mirko Baković
2. Muhamed Begović
3. Željko Bilbija
4. Violeta Kamberović

D) Interparlamentarna grupa u Interparlamentarnoj uniji (IPU)

1. Ramiz Vilić
2. Miro Grabovac – Titan
3. Miloš Jovanović
4. Halil Mehtić
5. Željko Mirjanić
6. Dragi Stanimirović
7. Dušan Stokić
8. Emina Zaćiragić

Ad – 3: Zahtjev za razmatranje po hitnom postupku (čl. 104. Poslovnika):

- b) Prijedloga izbornog zakona Bosne i Hercegovine (predlagač Vijeće ministara BiH)
- c) Prijedloga izbornog zakona Bosne i Hercegovine (predlagač g-din Mariofil Ljubić, poslanik Predstavničkog doma)

U diskusiji u okviru ove tačke dnevnog reda učestvovali su: Mirko Banjac, Emina Zaćiragić i Mirza Kušljugić.

Poslije diskusije predsjedavajući je pojedinačno dao na glasanje zahtjev da se po hitnom postupku, u skladu s članom 104. Poslovnika Doma, razmatraju prijedlozi zakona pod a) i pod b).

Dom je jednoglasno (u momentu glasanja prisutna 33 poslanika) usvojio zahtjev da se po hitnom postupku (u skladu s članom 104. Poslovnika) razmatraju:

- a) Prijedlog izbornog zakona BiH (predlagač Vijeće ministara) i
- b) Prijedlog izbornog zakona BiH (predlagač poslanik Mariofil Ljubić).

Predsjedavajući je, nakon usvajanja prednjeg zahtjeva, konstatovao da je u okviru ove tačke predložio da Dom donese odluku da se po hitnom postupku, po članu 105. Poslovnika, razmatra i usvoji posljednja verzija Izbornog zakona koju je pripremila ekspertska grupa međunarodne zajednice. Napomenuo je da prijedlog nije dostavljen u pisanoj formi.

Intervenisaio je poslanik Hilmo Neimarlija, naglasivši da je gospodin Banjac trebalo da dostavi tekst prijedloga zakona, te pročitao odredbe člana 105. Poslovnika.

Predsjedavajući je konstatovao da nije ponuđen prijedlog u pisanoj formi i da se o njemu ne može glasati.

Ovim je zaključena ova tačka dnevnog reda.

Ad – 4: Prijedlog zakon o udruženjima i fondacijama BiH (drugo čitanje)

O Prijedlogu zakona nije bilo diskusije.

Dom je jednoglasno usvojio Zakon o udruženjima i fondacijama, sa amandmanima i Izvještajem Ustavno-pravne komisije.

Ad – 5: Prijedlog zakon o vanjskotrgovinskoj komori BiH (prvo čitanje)

U diskusiji su učestvovali Mirko Banjac i Zoran Spasojević.

Predsjedavajući Komisije za spoljnu trgovinu i carine Tihomir Gligorić, obrazložio je Izvještaj te komisije o razmatranju prijedloga zakona. Naglasio je da Komisija nije prihvatila amandmane g. Mirka Banjca.

Poslije diskusije Dom je usvojio Prijedlog zakona o vanjskotrgovinskoj komori BiH u prvom čitanju.

Ad – 6: Ugovor o slobodnoj trgovini između BiH i Republike Hrvatske sa protokolom o definiciji pojma »proizvodnja s porijeklom« i načinima administrativne saradnje sa priložima

Dom je jednoglasno dao saglasnost za ratifikaciju ovog ugovora.

Ad – 7: Izjašnjenje o zahtjevu Vijeća ministara da se po čl. 105. donesu zakoni koje je na privremenoj osnovi proglasio Visoki predstavnik

Sa 27 glasova ZA i 5 suzdržanih, Dom je usvojio zahtjev Vijeća ministara BiH da se po hitnom postupku, u skladu s članom 105. Poslovnika Predstavničkog doma, razmatra svih 15 zakona koje je na privremenoj osnovi proglasio Visoki predstavnik za Bosnu i Hercegovinu.

Ad – 8: Poslanička pitanja i odgovori

Poslanička pitanja su postavili:

Muhamed Begović:

1. Koje konkretne mjere Vijeće ministara namejra preduzeti u pogledu ubrzanja povratka i u pogledu sprečavanja daljeg opstruisanja vezano za povratak prognanih i raseljenih lica?

2. Ko je nadležan da ospori i zaustavi proces mijenjanja naziva i postavljanja novih sa nacionalnim predznakom, kada se ima u vidu činjenica da je BiH istinski multinacionalna država ravnopravnih građana i naroda?

3. Kakve će mjere nadležni organi preduzeti u vezi s nastavnim planovima i programima u vezi daljeg realizovanja programa pomirenja i stvaranja uslova za suživot koji je neminovan u Bosni i Hercegovini?

4. Postoji li mogućnost za preduzimanje odgovarajućih mjera zaštite spomenika kao posebnog bogatstva naše države? Kada će Vijeće ministara predložiti Parlamentu donošenje odgovarajućeg zakona za zaštitu spomenika kulture? Šta Vijeće ministara namjerava preduzeti da se spriječe pojave podizanja spomenika ličnostima koje nemaju nikakav istorijski značaj?

5. Kada će se pripremiti prijedlog zakona o pravnom i materijalnom statusu domova penzionera?

Senad Šarganović:

1. Da li je istina da će doći do ukidanja carine u Bihaću - granični prijelaz Izačić?. Svi privatnici sa područja Unsko-sanskog kantona su protiv takvog pristupa i traže objašnjenje takve ideje.

2. Koliko je ukupno finansijskih sredstava sa graničnog prijelaza Izačić - Carinarnica Bihać, po svim osnovama uplaćeno na račun države Bosne i Hercegovine i Federacije Bosne i Hercegovine od 1995. do 2001. godine?

Miloš Jovanović:

Da li ugovori o razmjeni nekretnina, zaključeni od početka ratnih dejstava do potpisivanja Dejtonskog sporazuma, između ugovornih strana koje nisu boravile u mjestu u kome je vlasništvo njihovih nekretnina, odnosno izbjegli sa prostora FBiH u RS i obratno, proizvode pravno dejstvo, odnosno da li ostaju na snazi?

Zoran Spasojević:

Prigovorio što još nije dobio odgovor na tri pitanja koja je postavio na 4. i 5. sjednici, kao i na pitanja koja je postavio u vezi s Budžetom Bosne i Hercegovine.

Boro Bjelobrk:

Šta je Kolegij preduzeo da on dobije odgovor na pitanje koje je uputio Vijeću ministara, a koje se odnosi na potrebnu informaciju Vlade Republike Srpske povodom događaja u Trebinju i u Banjoj Luci? Naznačio je stepen hitnosti do 15. maja 2001.

Osma sjednica rad je završila u 18,15 sati.

Sastavni dio ovog zapisnika je magnetogram 8. sjednice Doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Sead Avdić